



# Tir Yimiyim

www.tiryimiyim.in

Regd. No. RNI. NAGAAO/2004/13113. Postal-NE/RN-717.

e-mail : tiryimiyim@gmail.com

TAPAK 6

Yangia anidakangma :

f Tir Yimiyim

ig tiryimiyim@aolima

yt tir yimiyim

TAPAK 8

Nikki Haley-i US tir election nung Trump yaritsü

Malaysia Masters: PV Sindhu quarter-finals-i iogo



VOL. XXI ISSUE NO. 221 (ADOK 221) DIMAPUR ROGONÜ (FRIDAY) MONUPII (MAY) 24, 2024 ₹ 5.00

## Asüing Mokokchung nung ghonda trok power shibangtsü

**Dimapur, Monupii/May 23 (TYO):** 33KV pole ka telaor aliba melentsü atema May 25, 2024 (Honibar) nü anepdang 9:00 ako nungi nikongdang 3:00 ako tashi power shibangtsü, ta Er. Achanger T Aier, Sub-Divisional Officer, Mokokchung Electrical Sub-Divisional ajanga sangdong

ka nung metetdaksü. Iba power shibangba yagi Mokokchung Town, Asetkong aser Ongpangkong nung aliba yimtsüing ajunga nung kongshitsü. Iba mapang nüburtemi timtem arema atatsü ayongzüker, ta sangdong ajangasa ashi.

## GPRN/NSCN (U) ajanga N. Kitovi Zhimomi dang kümdangtsü ashi

**Dimapur, Monupii/May 23 (TYO):** GPRN/NSCN tir Gen. (Retd.) M.B Neokpao Konyak aser speaker Ritsa Sangtam nati N. Kitovi Zhimomi nem totuyuba ka agütsüba nung, GPRN/NSCN nungi na April 21, 2024 nü anentsüba aser May 15, 2024 nü na züingsem nungi meindokba sülena nai temelaba makai maparen balala inyakba angazüker, ta shia liasü.

National Tatar Hoho aser Council of Kilonsers senden mena ajaki mulunga telemtetba agiba sülen iba totuyuba ya agütsü. Ajidang masü tatok magütsütetsüsa nai aibelenba aser telok atema tim masüba mapa inyakba atema nüsa na mejenbutetsü, ta GPRN/NSCN (Unification) ajanga ashi.

Anungji nai GPRN/NSCN (Unification) indang tenüing, seal mesüra tamalen agüja aliba designation tem amshitsü memelar aser ktdangsurtem tenüing menükja inyakshangshi masütsü metetdaksür, ta GPRN/NSCN (Unification) ajangasa ashi.

Na mapa nungi anentsüba anogo (April 21, 2024) nungi nai GPRN/NSCN (Unification) indang Ato Kilonsers tenüing amshitsü memelar aser iba tenüing amer nai osangtsüsang kecha agiteptsü memelar, ta ashi.

## ULBelection nung lenirtajung shimtsü ayongzüker: DDCF

**Dimapur, Monupii/May 23 (TYO):** Aruya aliba ULB election nung tokteptsü jangra/bilema aliba candidates ajak dang tajungtiba nung shilem agitsü moatsür, ta Dimapur District Citizens' Forum (DDCF) sangdong ka ajanga ashi.

nem maongka agütsütsü ayongzüker, ta DDCF ajanga ashi.

Dimapur nunga tetemsü aser mulunga aliba Dimapur lisopor tejangja tokteptsü melatsüla.

Maneni Dimapur nung alir nübür ajanga dang aruya aliba ULB election nung pei temeden vote agüja pei ward nung lenir tajungtiba shimtsü ayongzüker, ta ashi.

Dimapur nung aliba nüburtim lungjemer ism mesüra amokmerenba yimya mamshitsüla, tashi aser sen amshiba nungi jenbuttsüla aser Clean Election Movement den lirumedema aruya aliba ULB election nung democracy tanüla shidak amshia shilem agitsü ajungshir, ta DDCF sangdong ajangasa ashi.

Kasa mapang ajak dang iba ULB election ya democracy tanüla aser yimya shidak nung tokteptsü, isms yutsütsü, dangar amokmeren masütsü aser tashi aser sen mamshitsü ayongzüker, ta ashi.

State nung tetsür menden shilem 33 wazüka yur municipal elections mezüingbuba June 26, 2024 nü agitsü aliba nung political party tem dang tetemsü candidate aser tongtipangsa nüburtim tenzüka terenlok bener arutsü mulunga aliba candidate

## Nagaland nung matamabensar 29,600 dak tema lir

**Dimapur, Monupii/May 23 (TYO):** North East nung tang mezüingbuba North East State Commissioners for Persons with Disabilities mungdang Nouna Resort, Chümoukedima nung May 23, 2024 nü agia liasü, kong northeastern state pezü nungi ktdangsurtem arua aden.

ajunga nem maongka kasa agütsütsü meranger, ta Advisor, Department of Social Welfare, Nagaland, Wangpang Konyak-i ashi.

Mapa teinyaktsü jenti liaka asenok tanem-tanemi renloka aor aser ibai talisa Disability Commissioner indang office ajanga shilem tulu agiba ajanga lir, ta pai ashi.

Iba mungdang ya ajanga region nung Commissioner tem lungjemer policy gaps, melenshitsu nungdakba aser Act mapa kuma inyakba nung temelenshi nungdaka alibatem jangjatetsü, ta State Commissioner for Persons with Disability Diethono Nakhro-i ashi.

Parnok shisatsü aser tajangshibatem bendena parnoki

region aser national levels nung nungdakba temelenshi atema jembitsü aser matamabensar temeden asoshi telemtetba tajung agitsü, ta ashi.

2011 Census nung ajemdaker India kübok northeastern state ti nung matamabensar indang demographic data yamai lir- Arunachal Pradesh nung 26,734; Assam nung 4,80,065; Manipur nung 54,110; Meghalaya nung 44,317; Mizoram nung 15,160, Nagaland nung 29,631, Sikkim nung 18,187 aser Tripura nung 64,346 lir.

Tanübo northeast nung matamabensar ya 2011 Census nung bendenba dang nungi tali alitsü, aser 2011 Census nung matamabensar tabu ti dang bendena liasü.

## UNNATI sentong ajanga senotsü teyari 'Subsidy' agütsütsü

**Dimapur, May 23 (TYO):** Uttar Poorva Transformative Industrialization (UNNATI) ya 2024 küm nungi center government ajanga Northeast nung peisasa rongsen lenmang lapokteta mapa tenzüka inyakner entrepreneur-tem yaritsü asoshi senotsü teyari 'subsidy' agütsütsüba nükjidong nung latetba sentong ka lir.

Industry & Commerce Director, Wb.P.Tokugha Sema-i ashiba agi, tamalena center government nungi asenok mapa nung yarisesmsü atema teyari agütsüba sentong tapu balala liaka asenoki memetet aser temulung magütsüba agi magiteti süidaksüoigo, saka tang yabo shitakba mapa tenzüka inyaktertembo UNNATI ajanga teyari angutsüsa züingzünga inyakdaksütsü tangatetba lir. Paisa akok tashi par department nung ktdangsertemi Nagaland nung UNNATI sentong ajanga teyari agia mapa shitak tenzüka onertem ajak yaritsü mulunga lir ta metetdaksü.

Iba sentong nung shisalen teyur Wb.Saurav Sahewalla-ia Nagaland nung peisasa rongsen

yangluba mapa tenzüka onertemi akok tashi UNNATI ajanga aruba teyari agitsü asoshi sentong tajung renema inyaktsü ajungshi. 'Tanü asüingbo tiyazü nung subsidy magitetsü, anungji mapa shitak inyaktsüla aser mapa nung sen endokba ajakji tezüluba shitak alitsüla,' ta paisa ashi.

UNNATI sentong nungi teyari agia inyaktsüba mapa nung ya sen lakh 50 tema endoka tenzütsüba mapa asütsüla aser teimtiba agi crore 250 tashi endoka inyakba mapa renemer kodang tenzüka odir, idangji mapa kiburi mapa nung endoka aliba sen nungi tesadang 50% subsidy meshitetsü ta Saurav Sahewalla-isa ashi.

(Maneni tapak 2 nung...)

## 2024 Lok Sabha elections phase 6 buba nübuyim temogo

**New Delhi, Monupii/May 23 (Agencies):** 2024 Lok Sabha election phase trok buba nübuyim May 23, 2024 nü temogo.

menden 10 prong, Jammu and Kashmir nung menden ka, Jharkhand nung menden pezü, Delhi nung menden 7 prong, Odisha nung menden trok, Uttar Pradesh nung menden 14 aser West Bengal nung menden 8 atema vote agütsütsü.

Phase trok buba nungya states aser union territories ti nung aliba constituency 58 nung May 25, 2024 nü vote agütsütsü.

Iba phasen nung Bihar nung menden 8, Haryana nung

candidate 889 tokteper. Voting ya May 25, 2024 anepdang 7:00 ako nung tenzütsü aser nikongdang 6:00 ako nung tembangtsü.

Lok Sabha nung menden 543 atema election ya phase 7 lemsar April 19 nü tenzüker aser tatembangba phase ya June 1, 2024 nü alitsü aser vote ajunga ya June 4 nü azüingtsü.

## Mokokchung nung ULB election atema nübuyim tenzüker



Mrs. Wapangnaro Pongen

**Mokokchung, Monupii/May 23 (TYO):** Mokokchung Municipal kübok Ward No. 7, Kümlong Ward, Mokokchung nungi Wapangnaro Pongen-i 23rd May,

2024 nü la ULB Election-i aitsü asoshi tenüing sangdongba sentong ka lar kidang ayongzüka agiogo. Kümlong ward ya tetsürtem reservation küboki aiter.

Lai iba sentong nung jembidang, ya civic body election ka asünung, sorkar o Kümlong nübür tsüingta otongtar ka aser tesentakter tajung apular ka asütsü aser nübür tenzütsü tejangraba aser temulungtetba nung election nung noktaker, ta metetdaksü.

Loktii nübü aginüding lar kibongi akokba tashi pei sempet tenlaa tenzüka aruogo, ano alu wadang tasen ka nung lar kibongi

Kümlong ward sanger tenzütsü tejangraba tulu lir, ta lai ashi.

Tetsür nem menden mekazüka yutsüba "33% Women Reservation" atema ya Naga Mothers' Association-i anir lokti balalai kanga meranga noktaker ajanga tanü asangang nung iba temoatsüji mapa akümer, iba asoshi pelar. Aji oda, "nüburtemi ni shimtetra tetsür nem reservation agütsüba shiak agütsüoigo ta shitetsüsa ni inyak sayutsü mulungtetogo aser aji kü nükjidong lir", ta lai ashi.

Kümlong nüburtemi yaria adoktsüra, tetsür tebur ta kecha tebendang melii arok ajungtsü atema 18 ward councilor-tem

den külemi amteper pei ward aser Mokokchung Town rangben asoshi inyaktsü mulunga lir, ta laisa teinyaktsü kar lemsatepdang metetdaksü.

'Municipal Act 2023' ya asenok asoshi act tasen ka asünung, ibai inyakba aodang Aor sobaliba nung tetsükdaksü majurutsüsa timi inyakba aotsü tejangraba lir. Koba mapa inyakdir inyakaka kija bilemba nung masü ward yimden aser nüburtim den shisa agiteper ang kechisarena inyakba aotsü aser mapa ajak ochi shia inyaktsü, ta lai ashi. Inyakyim tasen ka inyakker asünung, nükmen maitsüsa tarutsü asoshi tsüingsü

tajung yutsütsü merangtsü, ta laisa shisem.

Asen ward tejakleni aser terenlokleni anitsü, takar sensaker kecha mebendangi ajak den sakuku ser lirumedema inyaktsü, ta lai shiogo. Item ajakji nübür teyari medeni meinyaktsü, anungji, Kümlong sangeri la nem yimli agütsütsü asoshi laisa mepishia metetdaksü.

Laisa ruling party dang temepishiba ka ashidang, "maongka ngura ni mapa tajung inyaktsüako, anungji, ni temsüa lira ruling ticket-ji kü nem agütsütsü mepishir" ta metetdaksü.

(Maneni apak 2 nung...)

# DIPR-i ayong skill up gradation training agiogo



**Dimapur, Monupii/May 23 (TYO):** Directorate of Information & Public Relations (DIPR), Kohima-i ayongzüka, District Public Relations Officers (DPROs), Assistant Public Relations Officers (APROs), aser Information Assistants (IAs) tem atema anogo ana atema skill up gradation training May 23 nü tenzükogo. Iba training ya Directorate of Information & Public Relations, Kohima nung agidaki.

Training tenzükba sentong nung Director IPR, Dzüvinuo Theünuo-i, ketdangsurtem dang parnok tamendakdak jangjatsü aser mapa melenshiba den takhangba balala adokba den liromedema aintsü ajungshia liasü. Laisa, sorkar tenzükera kaka ama parnok ya sorkar otongdar kaka lir aser parnoki iba shilem ya teti temulung dang ayutsüla ta ashi.

Additional Director, IPR Kevizayano-i, Department nung ketdangsurtem renloka aotsü nungdakba lemsatöp. Lai, nendak nendaka bendanga agüja tenzüksü aser department yongtsü nung ajak den

tesendaktep tajung ayutsü nungdakba lemsatöp liasü.

Mezüngbuba session nung News Editor & Regional news unit, Akashvani Kohima, Asonuo, IIS-i, 'Media Relations & Work Ethics for public sector officers' indang onük nung ajemdaker jembu. Lai, ethical conducts dak rangloker jembu aser sroark tenzükera kaka ama ajaki latetja aliba inyakyim sülen tashi anga anidaksü nungdakba lemsatöp. Laisa, training nung shilem agirtem dang report tem deadline temulung dang ayutsü aser pei mapa bendanga agüja inyaksü ajungshi.

Kasa mapang nung Deputy Director IPR Hongpi Konyaki, sentong nung shilem agirtem dang pei maitsü jangjatsü ajungshiba den sorkar takoktem aser police tem metetdaksütsü aser sorkar aser nüburttem tsüngda apu latsür kaka akümtsü ajungshi. Paisa, ketdangsur tejentem nungi tenzükera tekübokba jenjang nung inyaker tem tsüngda tesendaktep tajung ayutsü nungdakba lemsatöpba den public relations officers ama

parnoki department indang inyakyim tejakdangi bener aotsüla ta ashi. Pai ketdangsurtem dang osang tejangja agütsütsü ayongzüka liasü.

Iba training ya training sentong nung shilem agirtem skill aser shisatsü ajungketshitsütsü nükjiong nung ayongzüko, aser iba ajanga nüburttem tajungtiba tenzükettetsü aser sorkar inyakyim aser police tem tajungba metetdaksütetsü.

Training mapang public relations, communication strategies, aser digital putu nung DIPR mapa renloka aoba indang onüktem ayimjema agiogo. Training nung shilem agirtemi sensaksem nung shilem tajung agia parnok tajangshibatem lemsatöpogo aser iba ajanga tangazükba jenti kaogo.

May 24 nü training sentong kanga takok ngua tembanga district ajak nungi DIPR ketdangsurtem professionalism aser inyakyim tajungba akümtsü imlar, aser iba ajanga parnoki tenzükba nüburttem tali ajangzüksü.

# Commissioner of State Taxes-i GST Compliance Assessment indang metetdaksü

**Dimapur, Monupii/May 23 (TYO):** Commissioner of State Taxes, Sachin Jaiswal, IAS-i sangdong ka ajanga, Department of State Taxes-i, Commercial State Tax Officers (CSTOs) tem nem, state nung shishilembartem ajak indang GST Compliance Assessment dak sendakba nung survey agitsü, aser parnoki nungi tasüngdangba aser parnok tebilemba lemsatöpba bentetsü

nongloksüo, ta metetdaksü. Anungji shishilembar ajak dang teka amteper inyaka tenüngdakba osang aser parnok tebilembatem Commercial State Tax Officers (CSTO) den lemsatöpetsü mepeshia metetdaksüo, ajita asünungdang parnoki iba inyakyim ya June 30, 2024 nü tashi nungbo tembanga inyaktetsü.

# Sorkari HSLC aser HSSLC topper tem nem tetushi agütsütsü

**Dimapur, Monupii/May 24 (TYO):** Nagaland Board School Education-i sangdong ka ajanga, Toppers/Rank Holders, MILs & Skill subject tem nung takok angurtem aser HSLC aser HSSLC Examinations 2024 nung category balala nung Governor's Awards angutsü aliba Institutions tekolak ajak dang Angh-i tetushi agütsüba sentong June 12 nü 11 ako nungi tenzükera Dr. Imkongliba Ao Hall, Raj Bhavan, Kohima nung agitsü ta metetdaksüo.

mesüraba ajanga takümba iba sentong nung shilem agitsü atema tsürapurtem mejaok.

Iba dak sendakba nung institution tekolaktem dang parnok school nungi Toppers, Rank Holders aser tanga takok angurtem dang iba sentong nung shilem agitsü atema osang agütsütsü metetdaksüo.

School nungi confirmed lists ya June 7 nü 3 ako tashi nungbo nagaboard@gmail.com dang mail asütsü metetdaksüo, koba Governor's Secretariat nem agütsütsü.

Topper, Rank Holders aser Governor's Awards angutsüpurtem ajak iba sentong nung shilem agitsü jaokba kasa sangdong ajanga metetdaksüo. Toppers/Rank Holders aliba institution tekolaktema iba sentong nung adentsü jaokogo. Takdang

Sentong nung shilem agitsü jaokertem ajak sentong agitsüba tesem 10:30 ako nungbo tonga arua 10:45 tashi nungbo mener alitsü mepeshia metetdaksüo. Kaketshirtem ajak pei school uniform semer arutsü metetdaksüo.



Niuland District nung HSLC & HSSLC result tajungba kümdaksütsü atema district kübok Government High Schools aser Government Higher Secondary School tekolaktem den Deputy Commissioner, Niuland Sara S. Jamir-i May 21 nü senden ka ayongzüka menogo.

# UNNATI sentong ajanga senotsü teyari...

(TAPAK 1 NUNGI...)



Hotel Saramati nung UNNATI sentong indang shisadokten sentong alidang Nagaland Industry & Commerce Director Wb. Tokugha Semai jembiba noksa nung angur (Tir Yimyim, May 23, 2024)

Iba sentong ajanga teyari aginertem asoshi pei mapa tenzükera aotsü atema registration agitsüba mapang taküm küm March 9 nungi lapokogo aser 2026 küm march 31 tashi lapoka alitsü aser iba sentong ajanga teyari agütsüba mapang ya 2034 küm March 8 tashi alitsü ta paisa metetdaksü.

UNNATI sentong ajanga teyari agitsü atema inyaksüba mapatem rongnung nungdak oset kechisarina yangluba factory-tem, mozü ki aser mapa tapu balala inyak sayudak, tzü tajemtsü yangluba, chiyongdak

aser ayipdak, raliwalirtem amungdak aser nisungtem südoksünema kazüdak tesem amala mapatem aika dena lir. Iba sentong dak aketba temetetsü aser teinyaksü tem ajak tejangrartemi pei pei district nung Industry aser Commerce ketdangsertem den asüngdangtepa inyaksü akoktsü aser peisasa online nung unnati.helpdesk@gov.in email ajanga tongtepratep süa inyaktetsü. Ibai Ministry of Commerce & Industry, Govt of India kübok Department for Promotion of Industry&

Internal Trade (DPIIT) ajanga inyakba sentong ka lir.

Tanü iba sentong nung menden DIC Dimapur nung Functional Manager Wt.S.Rarenbenla liasü aser Industries & Commerce department nung Deputy Director Wb. Yawelie Noudi-i sentong tembanga jembu. Iba sentong nung Business Association of Nagas nungi tir Wb. Mongkum Jamiri anir züngsemtem den Nagaland nung tesem balala nung business inyaker aser inyaknertem dena liasü.

# Mokokchung nung ULB...

(TAPAK 1 NUNGI...)

"Asenoki shitakba lenmangji shimra, tarutsü anogotemji tesangwa lir. Asenoki aiben temelenshi indangbo jembir saka mapa agi meinyaker. Tanü ni election-i aiba ya temelenshi mapa agi inyaka sayutsü asoshi noktaker", ta lai ashi. "Nenoki ni temsüa lir ta bilemra aser nenoki kü dak temulung lemra yimlibilema ni yariangma", ta laisa mepeshia metetdaksü.

aser school ketdangsuba mapa küm 20 shi inyakogo. La ya kaket shishashiba nunga secular aser theology azüngba takutet nübu ka lir.

Arishi küm 52 tain Wapangnaro Pongen ya S. Panger Ao (Molungyimsen) kinungtsü lir. La ya Jubilee Memorial School nung tesayur

Sentong nung Kumlong Baptist Arogo Pastor, Kumlong Ward Chairman, Ungma nungi yimsüsür, Yimjenkimong Senso Telongjem Mokokchung aser Mokokchung Molungyimsen Senso Telongjem nungi ketdangpurtemi shilem balala agia liasü. Kumlong ward nung election-i inürji ano tangara ana (2) lir, ta osang ajanga angazükera.

# Mon nung vote azüngtsü training ayongzükera

**Dimapur, Monupii/May 23 (TYO):** Deputy Commissioner & District Election Officer, Mon, Ajit Kumar Verma, IAS ajanga sangdong ka agütsüba nung, Lok Sabha atema 18th General Election agir aliba Mon district kübok assembly constituencies 41 nungi 48 aser 55 atema Counting

Supervisors, Counting Assistants aser Micro Observers asoshi training ayongzüka lir, ta ashi.

Iba training Phase 1 ya May 29, 2024 aser Phase 2 ya June 1, 2024 anogotem Council Hall, Mon Town nung anepdang 10:00 ako nungi tenzükera agitsü, ta sangdong ajangasa ashi.



May 23, 2024 nü New Delhi nung Lok Sabha election atema nüboyim senden ka nung Rae Bareilly nungi Congress candidate Rahul Gandhi, North East Delhi constituency nungi INDIA teloktep candidate Kanhaiya Kumar, Congress lenir Sachin Pilot aser KC Venugopal nungger den tangartem tangokba noksa nung angur.

**Cyclone Remal agi West Bengal aser Bangladesh tesem kar kongshitsü**

**New Delhi, May 23 (Agencies):** Bay of Bengal nung yipru tesashi ka kümtetdar aser iba yipru tesashi jagi West Bengal aser Bangladesh kongshitsü. 'Remal' ta ajaba cyclone ji Amongnü, May 26 nü West Bengal tzyüimkümlen aser anasa aliba Bangladesh tonga arutsü aser iba yipru jagi tzyüimkümlen kanga mejungi kongshitsü, ta India Meteorological Department (IMD)-i metetdaksü. Met Department-i, iba yipru ajanga West Bengal kübok tzyüimkümlen aliba districts- North 24 Parganas, South 24 Parganas aser Purba Medinipur tesem aika nung tzunglu sashia arutsü. IMD-i, tang Bay of Bengal nung kümtetba yipruji asung (Hokolbar) tashi nung kanga tesashiba akümtsü, aser Honibar tashi nungbo east-central Bay of Bengal nung cyclonic yipru tesashi akümtsü, ta metetdaksüogo. Amongnü nikongdang tashi nung iba yipruji Bangladesh aser West Bengal tzyüimkümlen atongtsü, ta parnokisa metetdaksü. Iba yipru arutsü aliba dak sendakba nung Weather office-i angopurtem dang Amongnü tashi north Bay of Bengal-i angopui maotsü t e k ü m d a n g t s ü metetdaksüogo.

**June 1 nungi tenzüka driving licence temzüng tassenba benoktsü**

**New Delhi, May 23 (Agencies):** Driving licence agütsüba inyakyim melenshitsu aser gari lenmang nung lendong azüoktsü nükjidong nung Ministry of Road Transport & Highways-i temzüng tassen kar benokogo aser itemji June 1, 2024 nungi mapa küma benoktsü. Sorkari melaba private driving training centres nung driing test agitsü akok aser item centres jagi driving licence certificate agütsütsü, aser ibaji ajanga sorkari RTOs khuret pungbatsü. Driving license shidak malirtem dang senchi sen 1,000 nungi tenzüka 2,000 tashi achitsü, aser anojungi (arrshi küm 18 tekübok) gari anirshirtem dang senchi 25,000 achiba den külemi parnok tsuraburtem nem-a temerenshi agütsütsü. Sorkari temelaba agüja aliba private driving schools nung driving tests agitsü atema temelaba agütsütsü, ajisüaka item schools nung training agitsü atema ali peria alitsüla, testing facility junga alitsüla, aser kanga temsüa aliba trainers alitsüla. Temzüng tassenba kübok light motor vehicles (cars, scooters, etc.) atema hopta pezü tsünga tajemtiba agi training mapangji ghonda 29 bosa asütsüla aser heavy motor vehicles (trucks, buses, etc.) atema training mapangji hopta trok tsünga ghonda 38 bosa asütsüla. Training nungji theory (traffic rules angazükba) aser practical training (gari anishiba) mapang shidak lemsar gari anishiba tesayuba jungjunga agütsütsüla.

**Linük nung arem hectare million 2.33 moapu kümogo: NGT**

**New Delhi, Monupii/May 23 (Agencies):** National Green Tribunal (NGT)-i, nung arem hectare million aika chirepa moapu kümogo, ta shia Union Ministry of Environment, Forest and Climate Change (MoEF&CC) nung secretary densema sorkar ketdangsertem dang nungi telangzüba meshir. NGT-isa Survey of India director dang 2,000 küm nungi tenzüka linük nung, talisa Northeast nung arem indang osang tejangja agüjang, ta metetdaksü. Osangkaket nung report ka ajanga 2000 küm nungi tenzüka state balala nung süngdonglidong aliba arem li hectare million 2.33 moapu akümba dak sendakba nung National Green Tribunal-i ken o ka angadanga liasü. NGT Chairperson, Justice Prakash Shrivastava-i aniba bench kati, "Osangkaket nung ocet ka ajanga ashiba agi, 2001 küm nungi tenzüka 2023 küm tashi nung süngdonglidong aliba arem moapu akümba nungi moapu shilem 60 bo state pongu nung lir, ta global forest watch (GFW) data ajanga metetdaksüogo," ta ashi. "Assam nung arem hectare 3,24,000 moapu kümogo, Mizoram nung hactare 3,12,000, Arunachal Pradesh nung hectare 2,62,000, Nagaland nung hectare 2,59,000 aser Manipur nung hectare 2,40,000 moapu kümogo," ta bench-i metetdaksü. Tribunal bench nung tanünga züngsem anaji Justice Arun Kumar Tyagi aser expert member A Senthil Vel na lir. "Osangkaket nungji Food and Agriculture Organisation data densema lir. 2015 küm nungi 2020 küm tashi nung India nung küm shia arem hectare 6,68,000 moapu aküm, aser ibaji alima nung tanabuba jenjang lir, ta data nungji metetdakja lir," ta bench-i metetdaksü. Kasa report nungji Forest Conservation Act, Air (Prevention and Control of Pollution) Act aser Environment Protection Act anema inyakba indang metetdakja lir. Hombarnü tribunal-i MoEF&CCs nung secretary, Survey of India Director aser Central Pollution Control Board (CPCB) nung member secretary nungger dang telangzüba agüjang, ta tuyu. Survey of India nung director-i 2000 küm nungi India nung, talisa northeast nung arem osang tejangja aser 2024 küm March ita tashi nung küm pongungu sasep nung osang tejangja agütsütsüla, ta bench-i metetdaksü. Tribunal-i maneni iba ken o ya August 28 nü angadangtsü.



May 23, 2024 nü Patna nung RJD lenir, Tejashwi Yadav-i (ajichilen) election nüboyim sentong 200buba nung shilem agiba nungtem nung helicopter ka nung cake rangsadang tangokba noksa nung angur. Kasa noksa nung Vikasheel Insaan Party (VIP) Tir, Mukesh Sahani-a angur.



May 23, 2024 nü Mahendragarh district nung Lok Sabha election sentong ka nung Ato kilonser Narendra Modi aser Haryana Chief Minister Nayab Singh Saini na tangokba noksa nung angur.

**SBI State Bank of India**  
**STRESSED ASSETS RECOVERY BRANCH, JORHAT**  
 Na-Ali, M G Road, Jorhat, Opp. ASEB Building, PIN-785001 (Assam)  
 Tel No : 0376-2300193 / 2300204

[Rule - 8(1)]  
**KIOJEN AGIBA NOTICE**  
 Securitisation & Reconstruction of Financial Assets and Enforcement of Security Interest Act, 2002 kübok section 13(12) aser Security Interest (Enforcement) Rules 2002 Rule 3 nung agüja aliba tashi nung ajemdaker tsünglanglen sign süa aliba State Bank of India officer-i 03.11.2023 anogo nung Demand Notice ka ajanga sen apur M/s Nature's Glory Departmental Store, Proprietor Smt Helis Karki dang Demand notice agütsüba anogo nungi tenzüka anogo 60 tsünga notice nung shia aliba ama Rs. 20,11,554.75 (Rupees Twenty Lakhs Eleven Thousand Five Hundred and Fifty Four and Seventy Five Paise only) agüjang, ta tuyua liasü. Ajisüaka sen apuri senji magütsütet nung sen apur/Guarantor aser nüburtem dang tsünglanglen sign süa aliri iba Act kübok Section 13(4) aser Security Interest (Enforcement) Rules, 2002 nung Rule 8 nung agüja aliba tashi amshia 2024 küm May 20 anogo nung tsünglanglen shia aliba kiojen agiadokogo, ta sangdonger. Sen apur/Guarantor aser nüburtem dang iba kiojen dak sendakba kecha inyakshangshi masütsü metetdaksür aser kari danga tetuyuba anema inyakra State Bank of India-i 03.11.2023 anogo tashi nung Rs. 20,11,554.75 (Rupees Twenty Lakhs Eleven Thousand Five Hundred and Fifty Four and Seventy Five Paise only) den 04.11.2023 nungi tenzüka tetemlok meshitsü. Sen apur dang iba Act nung Section 13 kübok sub-section (8) nung aliba ama mapang shidak nung item kiojen alangzüksü atema inyaktsü metetdaksür.

**Mebelenshitba kiojen:**  
 Hypothecation of stocks and book debts & receivables  
**Kiojen osang tejangja:**  
 House No. 05, Thilux Village, 3rd Mile, Dimapur, Nagaland nung Helen Sumi tenüng nung Patta No. 608, Dag No. 140/816, Block-Darogapathar, Mouza-3, measuring an area of 3456 sq. ft i.e 00B-01K-04Ls kimong nung aliba ajak aser building.  
 North tsütsülen: NH Nagarjan Road, South tsütsülen: Phushiho Yeptho'er kimong, East tsütsülen: Phushiho Yeptho'er kimong, West tsütsülen: Peace Yeptho'er kimong  
 Date: 20.05.2024  
 Place: Jorhat

Authorised Officer  
 (State Bank of India, SARB Jorhat Branch)



## TIR YIMYIM YIMOBILEM (EDITORIAL)

DIMAPUR ROGONÜ, MAY (MONUPII) 24, 2024

### Anü kanga tsüka apur

India nung tang ya tesem aika nung anü kanga tsüka puloktsüba mapang lir, ibayongji government-ia nübortem dang anü apuba mapang kima yimdong nung kumdanga senzüsüba dang masü saka peisasa pei amshiba oset agi lendong memenatsüsa kumdanga alitsü asoshi temetetsü aser teinyaktsü aika metetdakja lir. Atangji, Tsüngremi Naga lima yabo alima lendongtem aika nungi kümzüka alitsüsa yangluja lir, ibayongji asenoki tanga limatem nung menoknok, tzümetsüng aser yipru mopong lendong agi yimti dena samatsüba tatalokbatem anguba aser angashiba dak alaka asenokibo item lendongtemji majurudang. Ibaji dang masü saka Naga lima mopong yabo kanga tatsüka masü aser kanga temekonga masü asenok ayongayonga alitsüsa teyarika yangluja lir, iba jagi asen lima nungbo nisungtem anü tatsük agi puseta asüba aser temekong agi sükseta asüba osangbo mangashir. Ajisüaka, akhi putu ama masü, tanü putu nung yabo nisungtemi pei nüngdak tapu aika apiteta yanglutetsüsa shisa tenük lapoka tashitemetet aküm nungji asen kidang amshiba osettsüset aser aseni agiba abensüoshi nungi tenzüker ali nung gari, anüng nung tayimtsü, tzüim nung rong asen ita petinu tashi tonga atutsüsa yanglutetba tayimba osettem ajakji industry tapu balala nung merang aser yin tatsük agi mi kümdaktsür yangluba osettem lir. Iba tatsük tangola aser mokozü agi ali aser anüng ajak tsüka kümdaktsüba den amang sangwa memetet ali nung gari senzüba aser light tesangwa atsükba nungi tatsük adokba agi rüjep lima dena yimsaa aotsüsa tzü mopong tsüka kümdaktsüba temelenshi agi tanü alima nung alir ajak timtemtsüsa atalokdagi. Item temelenshi denji ano alima aser anü-ita- petinu jajaba yimyatem nunga temelenshi aliba ajanga alima nung tsüngküm mongputem ya akhi ama masü saka tatsükba aser temekongba akümba asenoki meteter. Aji oda, tang ya ano tsüklaawa tiyonga matong ser asen lima nung dena Dimapur ama nungbo, anü kanga sashia apuba agi, anüngdangbo alu mapa inyaktsubajibo yutsür kima yimdong nung senzüsüba mekoki alima kanga tsüka kümogo. Iba ama anü kanga sashia apuba agi alima kanga tsüka akümdang asenok nisung shiai peisasa pei lendongi maitsüsa rajema inyaktsuba mapa aika lir. Item rongnung tongtibang kaji anü tatsük süaka koda masü pei nüngdak jajadang tula talang (long sleeves) aser tejak tongdanga korang asemtsübaji mamatsüla. Ano, tanü asüngbo asenok aika pei gari nung dang senzür asünungji anü pua gari anena ayudang gari telongi mopong aitsüsa window glass terabo lapoka yutsüsüla aser gari tsüng nung mopong tali enoker mesenzüsüla. Anü apuyonga aser tzünglu aruyonga asenok taküm nüngdak asoshi mapabosa inyaktüsü akümtsü, anungji tang ama anü tatsük apuba mapang ya asenoki mapa inyakba mapang melenshia, anü tatsük makümdang anepdang yakta saaka mapa inyaktüsü aser nikongdanga anü anüka kümer tenük agi angu tashi inyaktüsü aser anüngdang anü tatsük mapang kilong nung anisüngzüka kazütsü ta süra, iba jagi asenok temanga meraksatsü aser mapa nunga tamakok malutsü. Ano, tang ama anü tatsük mapang asenok kümdangtsübaji mi melamelaa jangrulokba aser aplokba toztü, mozü tzü aser gas ama anü tatsük nung mayutsüla. Aji oda, anü kangasa tsüka kümra alu mapa dang masü saka school aser sentep mapanga melenshia akanung, iba jagi nisungtem anü tatsük lendong nungi kümzüksü aser school aser sentepa ayongayonga agitettsü. Mapatem ajak rongnung tongtibangtibaji asen temang anema alitsüba ya lir, anungji tatsük mapang nunga aser temekong mapanga anogo shia tzü peria ajemtsübaji kanga tenüngdaktsü aser talisa tang ama, kanga tatsük mapang ya temang nung tzü merusepdaktsüi tzü peria ajemtsübaji ajak atema tongtibangtiba teinyaktsü mapa asütsü.

## OLEMSABANG



OFFICE OF THE  
**LANGPANGKONG KAKETSHIR MUNGDANG**

*Langpangkong Students' Conference*

H.Q. Chuchuyimlang – 798614. Dist. Mokochung : Nagaland  
Email: Langpangkongkaketshirmungdang@gmail.com

### YIMYIM AYIMOKTSÜR

Langpangkong kaketshir Mungdang(LKM) Mendenti ajanga 'CLEAN ELECTION' tarutsü asen lima mangdang tulu aser nükla tajung nung rangloker nübortem maneni ajungmosoa 'YIMYIM' ajangajanga ayimoktsür.

Asen Naga kin ajaki aser talisa LANGPANGKONGSANGER Tzükong telongtet aser Naga lima balala nung alirtem ajaki maneni LKM 'CLEAN ELECTION' dak rangloker aruya aliba ULB ELECTION ochiba nung shilem agitsü ajangajanga nenshia ayimoktsür.

Iba 'CLEAN ELECTION' mangdang takok angutsü asoshi Naga kin aser talisa Langpangkongsanger Yimden, Arogo, Lanur, Kaketshir aser lokti ajaki pei akok shilem tajung agitsu asoshi ajungmosor.

Maneni, LKM ajanga aruya aliba ULB ELECTION nung shilem agitsüpur(Candidate) ajak asoshi sarasademtsür aser talisa Naga lima mezüngbuba tetsür (women) shilem agiba ajanga temelenshi tulu arutsü yimla atar.

  
IMLINOK  
PRESIDENT LKM  
President  
Langpangkong Kaketshir Mungdang

  
(MEYITONGPANG)  
GENERAL SECRETARY LKM  
General Secretary  
Langpangkong Kaketshir Mungdang

## Tanela sempet amshiyim nung tangatetsü olen kar

- L. Kika Pongener.

(Yashi adok nungi...)

**Tsüngrem lar & Counsellor-temi metettsü tongtipang amai bilemba kar :**


1. Revival/Follw-up amala sentep nung, taneptsüba mapa 'Healing Service' inyakdang, sentep tembanger külenang inyaktsüla. Sentep madem-ser inyakra, anema alir tounurtema dena mooteti soita ayur. Talisa, taintembo teberem agi mapang talangka amentsü makoker aser metsümeshi onua kanga tim-atemer.
2. Revival nung sentep medenzükdang ken atenba mapang, ken anir-i telok ajak külemi nokdaker ken atentsü ayongba yabo melenshitsüla. Tantsür-tambur aser temang manemertembo ken aika nokdaker atandangji kanga tim-atemer, ashiko, karbo laotsüa kecha meshitet. Telok ajak nokdakdi ta ayonger kari tashi mangara topur majung. Anungji takoker-ibo/temulonger-tembo nokdaker tendi ta asüba-ang tajungba.
3. Mapang kar nung sentep medenzükdang lokti sarasadem ayongzüker. Iba mapang karibo tekülem tenzüksü tanaben tsüngtsüng (Bell) atemyongjia maneni talanglang sarasademer, ibajagi tekülem raksatsür ta metettsüla. Sarasademba ya-a awashi meteta aser mapang meteta sarasademtsüla.
4. Nungdakba-pur kar atema sarasademdang, kibur jagi nemeter sarasademtsü maginura/memulongra khangshia-bo menemettsüla. Ano shiranger mejangba room-i aitsü kiburi memulongra, room tema nungi dang sarasademtsüla. Awashi memeteti inyakra temoatsü angutsü melena meyiper metsüdaktaktsütsü.
5. Tsüngrem lar/tenzüker asüyongjia mimchir dang asünung, tashimait/aibelen karbo alitsü akok. Aji oda, parnok atema Tsüngrem'er tejembiba kar lira lokti nung masü, saka pa/la dang kipok nung ashitsüla.
6. Arogo nung Revival agidang, Sannukeri anir tongti-tenzükertemi Revival sentong ajakji acha-ayanger. Revival nung yariteptsü atema 'Counsellor' jaokertemi, parnok nem kechi mapa nungloktsü aji takok ngua inyaktsüla. Iba dakji alaka, tanga mapa nungbo teka amuoka meinyaktsüla. Aji oda, tashimait kar ajitetra, itemjibo arogo nung Sannuker aser tongti-tenzükertemi repranga inyaktüsü toktsütsüla.

Asenok ya joko küm noklang-150 tema amanga arur, joko tang yabo tamang nung teintet asütsüla. Küm-150 teintet tamangertem ama sayutsüngiba, tekülemba, sempet amshiba, Counselling, Tanela anir aruba...item mapa ajak nung meraketa inyaktsüla. Ajisuaka, tesasatsüka, mapa kar-kar nungpo tamang nung kinutem amai inyakba angudang kanga sasar. Yongji, ni laishir ka mesuaka, ni laishiba bushidang züngshiba nungi kü tamang aser tangatetba yari, Tanela sempet amshiyim olen kar lemsateper. Metokmeperi kar lira metongshia agitsü mepeshir.

**Iba Olemsabang nung lemsaba ken-o aser shisatsü ya iba ocet züluri bilemba ken-o ama tazünger angateta agitsü mepishir**

# Eritrea nung Khristan putir Rev. Ghirmay tepuokdak lia asü

Rev. Ghirmay Araya



**May 23, 2024:** Eritrea linük nung Arogo lenir ka tepuokdak lia asüba sülen Khristan melungtet telok kati alima linüktem dang iba linük nung yimsü temeden alitsü atema Eritrea nung lenirtem rongshitsü ayongzükogo.

Eritrea linük nung Full Gospel Church tenzükertem rongnung ka, Rev. Ghirmay Araya 2021 küm apuba sülen pa jail nung lia taoba hopta süogo.

Ozüng alema inyakba atema pa maitsü, ajisiüaka 2021 küm pa pua Wengel Mermera Central Criminal Investigation Centre nung puoka lia taoba hopta süogo. Pa arrshi küm 83 liasü.

Alima tesem balala nung reshikangshi ajangshiba Khristantem yariba melungtet

telok- Release International (RI)-i, Rev. Araya-i timtem ajangshiaka pa tamang jenjang nungi matsüngshi, ta metetdaksü.

Release International partner, Dr. Berhane Asmelash-i, "Rev. Araya asüba atema ni kanga jashir. Rev. Ghirmay-i Eritrea aser Ethiopia naprongla nung küm 60 dak tema Arogotem tenzüka aruogo. Pai Orthodox aser Lutheran Arogotem tenzüka aruba asülen tesüsa Full Gospel Arogotem nung tenzüka liasü," ta metetdaksü.

Rev. Araya-i chirnur pongu aser semchir 13 toktsür pilaogo.

Osang angazükba agi par jabaso rongnung ka, Lutheran pastor kata tang tashi shipping

container ka nung pua lir.

Dr. Asmelash-i, Eritrea linük nung Khristan lenirtem aika tepuokdak lir aser aika kanga tain kümer temang nung timtem balala agi shiranger, ta metetdaksü.

"Onoki Eritrea sorkar nem temepishiba agüjaka parnoki telangzüba magütsür. Anungji ni alima linüktem aser tamangertem dang sorkari tai maket nüburtem anema inyakba ya nokdangtsü atema iba linük nung lenirte, rongshitsü mepishir," ta paisa metetdaksü.

Dr. Asmelash-i tawa pai züluba kaket 'Brother, I Have Come to Arrest You' sayaa liasü aser iba kaket nungji pa pua jail nung puokba otsü tejangja shia lir.

# Manipur nung yimjung atema Arogoi ketdangsüa inyaker

**May 22, 2024:** Yaküm May ita nung Manipur state nung rara adoka nisung 220 dak tema asüba sülen tang mezüng Arogo telok ka leniba nung tribal Kuki Khristantem aser Meitei Hindu nungertem ajurua rara anentsü atema jembio.

May 17, 2024 nü Assam state nung All-Manipur Christian Organisation-i ayongzükba senden nung shilem agir Arogo lenir kati, "Iba senden nungji telok anaprongla nungi züngsem tenetnet (7) aden," ta metetdaksü.

All-Manipur Christian Organisation nung ya state nung aliba Khristan denomination balala ajak densema lir.

Manipur nung rara adokba sülen yimjung atema tang mezüng ayongzükba senden nungji Meitei Hindu aser Kuki-Zo Khristan lenirtem aden. Iba sendenji Guwahati nung aliba Salesian house, Bosco Reach Out nung amen.

Ato kilonser Narendra Modi-i aniba BJP sorkar kübok state administration-i iba rara ya mennokdangteter, ta

mongintemi metetdaksü. May 22 nü osangbener den jembidang Arogo ketdangser kati, "May 17 nü senden nungji lenirtemi state nung yimjung asoshi o lemtepa liasü," ta metetdaksü.

Paisa, iba senden ya kanga junga agitetogo, kechiyong telok anaprongla nungi lenirtemi pepei nüburtem nem angatetdaksütsü bangjema liasü, ta metetdaksü.

"Atangji iba senden nung parnoki telemtetba agiba ajanga tajung adoktsü," ta Arogo lenirisa metetdaksü.

State yimtiba nung aliba Imphal diocese ajanga state nung Arogo ajak ayimjemer aser Arogo nung tongti putirji Archbishop, Linus Neli lir.

All-Manipur Christian Organisation nung Tir, pastor Simon Raomai-i, May 17 nü senden nung adener telok anaprongla nungi lenirtemi, 'Manipur nung nüburtemi rara masü saka yimjung aginer' ta bangjemogo, ta metetdaksü.

May 21 nü osangbener den jembidang pastor Simon-i, iba senden nung shilem agia adenertem tenüng

memetetdaksütsü, ajisiüaka tesülen onoki osang tejangja sangdongtsü, ta metetdaksü.

Yaküm Myanmar nung tribals nem agütsüba maangka balala majority Meitei Hindu nungertem nem-a agütsüba nungi state nung rara tulu adoka liasü.

Court-i state sorkar dang Meitei Hindu nungertema tribal nüburtem ama züngshia sorkar mapa aser shisaliok rejutem nung menden shiteta yutsütsü tetuyuba agütsüba sülen Kuki Khristantemi iba tetuyubaji anema longkak aitba nungi rara tenzük.

Nütsüng million 2.3 aliba Manipur state nung nütsüng shilem 51 dak tema Hindu nungertem lir aser nütsüng shilem 41 Khristantem lir.

Iba rara nung nisung 220 dak tema asü aser nisung 50,000 dak tema jenshia liasü. Iba dak alia Tenla kitem aser Arogo kiojen 350 rongdoktsü mesüra raksatsü.

Yaküm rara adokba sülen Khristantemi Chief Minister, N Biren Singh-i aniba state sorkari Hindu nungertem pusemer, ta tai tonglokja liasü.

# ANOGO ABEN TSÜNGREM DEN

## Angoshia Chiyungtsü

"O, anogoshia Ne ozüng nung shisadangtsü ni koda meimer" (T. Ken 119:97)

Ninang mochitsü chisang tila (teaspoon) ka sünga yanglutsü atema ninang tilaji 4200 ben oli aruli ta senzür. Iba tetezü anogo nung 100 ben oli aruli asür aser ken orr aru nung minute 20 agir aser naro 400 dangi aor ta ashir.

Laishibaji ninang mochitzü den medemdanger (T.Ken19:10; 119:103). Laishibaji küm 1500 tashi nung zülu. Tsüngremi putu balaka nung nisung balala den lenmang balala nung jembi. (Ibri 1: 1). Pai pa tebilemba tarensena jungkai adoktsü (Isa. 28:10). Tsüngremi pa kaket züludang ilunga mezülu. Iba kaket züludang pai kanga aremzüka inyak, kechiaser ibai kodanga memelenshitsüsa zülu.

Asenoki taremezük agi Lai mebushiba agi Lai-i kechi ashir aji asenoki mangateter. Mezüng Khristantemi külemi aser kijai Tsüngrem o nung shisadanga bushiba ama tawa tanü Khristantemi meinyaker. Sayutsüngirtem aser Pastortemi nai-aa aruba nungi ter nung ka Tsüngrem nem agüjang ta sayur saka anarongtena inyaker. Anogo nung Tsüngrem o nung ghonda ka endoktsü meindokteter. Manna koba agi Tsüngrem-i pa pur arem nung küm lir jajadang mesü, ibaji Tsüngrem o temoatsü lir. (Anitet. 16:14-36). Tsüngrem o nung nangzüka aliba temoatsütemji asen meyong kümnüra asenoki Tsüngrem o bushiba nung mapang agitsüla. Tsüngrem temoatsü agitsü lenmang tatsüba mali. Shirnoki Tsüngrem o shisadanga nung mapang agir parnok temoatsüba.

Kotak nungi Manna, anogo shia chiyungtsü agitsü ni renema lidakjang.

# China nung Khristan putir ana samaba sülen tang tashi mangur

**May 23, 2024:** China nung Baoding diocesan seminary aliba underground Arogo ka nung dean inyaka liasü. nungi putir ana samaba sülen 2020 küm November ita tang tashi tenaprongla mangur, nung sorkar ketdangsertemi iba ta osang ka ajanga metetdaksü. seminary mita aodang putir ana

Hebei Province kübok Baoding diocese nung Khristan putir ana- Chen Hekun aser Chi oteta liasü.

Huitian na taoba ita sama, ta Ano külen April 17, 2024 nü May 22 nü Khristan melungtet Baoding nung Chi sama

telok China Aid-i metetdaksü. ajsüaka tesülen police-i pa par tasoli Xingtai-i anir oa pua lir, ta metetdaksüogo.

China nung underground Arogo tulutibatem rongnung Baoding diocese densema lir. Chi'er kinüngertemi, "Pa Iba Arogo yagi China nung kong aliar meteta alirtemi onok Communist sorkari temelaba agüja aliba Chinese Catholic onoki pa atema sarasademjang ta mepishir," ta metetdaksü. nung register asütsü China nung sorkari melaba Chinese Catholic Patriotic Association (CCPA) nung register asütsü memelunger

Chen ya ketdangsertemi apu asütsüa akok ta bilema Baoding diocese-i Khristantem dang register asütsü memelunger putir Chen atema Arogotem aser putirtem kanga sarasademjang, ta mepishia reshikangshir. register asür Khristan putirtembo yimtenren senden balala nung adentsüsa akümer.

April 29 nü nisung kari Hebei Putirtemi iba Association nung adentsü memelungra maneni tepuokdak ayutsüa province kübok Zhangjiakou yimti nung Chen par kidang lia nung adentsü memelungra puer ao, aser tang Anxin County nung alitsü südi ta bilemer. akok, ta China Aid-isa nung akok, ta China Aid-isa

Chen ya Anxin County nung aso; pa putir akümba sülen metetdaksü.

**AO OSHI ANGAZÜKDAK:  
TANÜ ANGAZÜKTSÜBA OJANG**



**Süngtzü**

(n) süng nungi agizükba tzü (sap from tree)

\* Tsüngko süng nungi tzü agizüka sü nung noksa ateper.

**Süngwa**

(n) süng wazüka ayuba arem ( reserved forest)

\* Tanü asüngbo yim ajak nung süngwa tululu angur.

**OLONG PAITEP # 6796**

1				2				3		4
5		6								
						7				
8										
										9
		10				11				
				12				13		
14										
						15				
16										

**TIPILEN**

- 2. Auonungchiyongsüasenba
- 5. Mangyimba mapang
- 7. O lamendakdak
- 8. Peidak malangba
- 10. Juli
- 12. Sen ayudak
- 14. Tenük agi ajitet
- 15. Tamajung aküm
- 16. Apuso

**LANGTSÜNGLEN**

- 1. Lenmang
- 2. Aor kidong ka tenüng
- 3. Tenarong maten
- 4. A \_\_\_ g
- 6. Mopung apodoka
- ola adokdaksüba
- 9. Tongtipang tagitsü
- 10. Menungra bilem
- 11. Aiür
- 13. S \_\_\_ k
- 14. T \_\_\_ r

**OLONG PAITEP # 6795 TELANGZÜBA**

**TIPILEN :**

- 2. Pongsen, 5. Lepko,
- 7. Omen, 8. Maongka,
- 10. Yangkhu, 12. Senpong,
- 14. Angu, 15. Raksa,
- 16. Arameso,

**LANGTSÜNGLEN :**

- 1. Alimang, 2. Pongen,
- 3. Samaru, 4. Nün, 6. Pio,
- 9. Nüngdak, 10. Yongya,
- 11. Kongro, 13. Ora, 14. Ata.

**NAI-A YA METETTER MA**



Dawa Finjok Sherpa-i May 20 tasembenbuba Mt. Everest-i (Sagarmatha 8848.86m) tuogo. Pai anogo 8, ghonda 13 aser minute 35 nung iba alizüng ya tongteta liasü. Seven Summit Treks Everest Expedition nung shilem ka ama pa May 12, 2024 apuso aser iba sülen ano May 17 nü maneni tenemi atu aser tatemsa May 20 nü tua tonga liasü. Pai supplemental oxygen dang amshia liasü.

**Assam: Lakhimpur medical college dang IMC-i sench crore 1 achi**



**Lakhimpur, Monupii/May 23 (Agencies):** Indian Medical Council (IMC)-i Assam nung Lakhimpur Medical College and Hospital (LMCH) dang senchi sen crore 1 chiogo. Institution nung inyakyim aika atakzükja aliba ama inyaksangshiba masüba atema iba senchi chia liasü. LMCH principal dangi yokba shiti ka nung IMC-i college nung inyakyim aika meshidak aliba indang

metetdaksüogo. Shiti ajangsa, bangdaka aliba due aser sentsüthem college-i tangsa tang maora ano jenjang talila agitsü ta tekümdangtsü metetdaksüogo. Council indang shiti nung, Lakhimpur Medical College and Hospital nung surgery balala agiba mapang electricity maliba, department aika nung staff peria maliba aser medical college indang principal aser departmental tekolaktem

mapangshia college-i maruba indang shia lir. Course inyakyim shita benoka inyaksangshi masüba, statutory provisions, regulations, aser apex medical education regulator-i 2023 küm amenoka toktsüba minimum standards tem shita benoka inyaksangshi masüba medical college tem dang senchi sen crore 1 achitsü atema National Medical Commission (NMC)-i benokogo.

**Police ket nung nisung ka asüba sülen Lakhimpur nung mepetmesü adok**

**North Lakhimpur, Monupii/May 23 (Agencies):** Aija alir ka police ket nung yua aliba mapang asüba sülen Brehostibarnü North Lakhimpur nung mepetmesü adok. Nüburtemi long agi aonba sülen police aika yiruo. Arshad Ali police ket nung yua aliba mapang asüba osang prokshia aoba sülen iba lendong ya NH-15 nung Brehostibar anepdang Khelmati Police Outpost jakdang ataloka liasü. North Lakhimpur kübok Pub Chanmari nungi Arshad Ali (42) ya mobile phone auyaba atema Khelmati police-i pua bener ao. Police-i ashiba agi, Arshad temang majungba ajanga police outpost telung nung laodok aser

Lakhimpur Medical College and Hospital-i anir ao, ajisüaka pa tasü bener aru ta sangdonga liasü. Pa asüba osang prokshia aoba sülen, nisung meyrejang aika Khelmati Police Outpost kima adenshi aser parnok pa asüba kuli aser pa nem ochi obendang agütsütsü khanga longkak aita liasü. Nüburtem timba küma aoba mapang police personnel aser paramilitary forces aika iba tesemi yoka liasü. Longkak aitertermi NH-15 ya ghonda ana atema nokdanga ayu. Longkak aitertermi senshidaktsütsü atema police-i lathi agi parnok dak züka liasü

aser longkak aitertermi meyipar parnok dak long agi aon tenzük. Long agi aonba sülen police aika yiru aser osangbenertem kar yirua liasü. Iba sülen tensa mejungi lir. Kasa mapang nung Assam Police DGP-i X sabang ajanga, iba ken o dak sendakba nung Khelmati Outpost Inspector in Charge Dipankar Changmai aser on-duty sentry Constable Bhairab Deori aser Home Guard Anil Bora nung mapa nungi anentsüogo aser Adl SP Biswanath lenisüba nung ken o bushitsüngdangtsü atema lokti ka tentetsüba den DIG, Northern Range North Lakhimpur-i yokba metetdaksüogo.

**Manipur: NIT campus wall raksatsüba atema nisung 15 apu**

**Imphal, Monupii/May 23 (Agencies):** Imphal West district kübok Lamphelat nung National Institute of Technology (NIT) indang km 1.50 jara raksatsüba atema Manipur police-i nisung 15 aser gari pongu puogo. Iba km 1.50 talang jara ya sen crore 2.65 shi intoka yanglua liasü. Lamphel police station nungi team kati Imphal West district nung Lamphel kübok tesem balala nungi nisung ishika puogo.

Jara nungi agizükba brick aser tanga construction materials tem belentsü atema amshiba Mini Tata truck asem aser auto-rickshaws ana dena puogo. NIT Director-i Lamphel Police Station nem tashishiba ka agütsüba sülen police temi takaratiba nung jenjang agia liasü. Director Dr. Khumanthem Manglem Singh-i ashiba agi, mejangjaba nisungtemi campus jara aden ait aser brick aser

tanga construction materials tem auya liasü. Osütem auyar aoba indang May 21 ka nü jangja aküm aser Ministry of Education nem onsang agüja liasü. Item nisungtem ya Bodhbarnü apu ta police-i ashi. Police-isa, parnok Imphal West nung Chief Judicial Magistrate court dangi anirogo aser anogo 15 judicial custody nung ayutsü. Maneni garitem ya Lamphel police station nung sota yua lir, ta ashi.



Lamphel Khunou tetsürtemi Brehostibarnü court order ka bener Manipur kübok Imphal West district nung Regional Institute of Medical Sciences (RIMS)-i aoba lenmang nung kikümtong anasa tokja aliba signboard aser barricades tem agintsüogo.

GOVERNMENT OF NAGALAND
DIRECTORATE OF SCIENCE & TECHNOLOGY
NAGALAND: KOHIMA.

No.S&T-Trg/67/10

Dated Kohima, the May 24

"Drone Pilot Training for Rural Women"

The North East Centre for Technology Application and Research (NECTAR) Department of Science & Technology (GOI) invites Indigenous Inhabitant female for "Drone Pilot Training for Rural Women" to 10 qualified women from North East region at RPTO, Boko Guwahati, free of cost.

- Criteria for application : 1. Indigenous Inhabitant Female 2. Qualification : Class 10th Pass 3. Age limit : 18 to 65 years

Address for submission of Application: Director, Science & Technology, Nagaland Kohima. Below Civil Sectt. PIN No.797004

The last date of submission of application with details:-contact number/E-mail address/address for

Correspondence is 29/05/2024.

Sd/ (ZENEIKHONUO VIMERO) Director.

China-i Taiwan temeket nung military drills agir

Taipei, Monupii/May 23 (Agencies): China-i Taiwan temeket nung ananü atema military drills tenzikogo aser ibai pei sasa yimsü asüba asetkong indang "separatist acts" atema temerenshi lir ta mitkar temi ashir.

Tir William Lai indang inauguration agir anogo asem lir iba drills ya tenzüker, shibai China dang asetkong amokmerenba anentsü aser par democracy agizüktsü ayongzüka liasü.

China-i Taiwan ya razüka aoba province ka aser tatem nung Beijing küboki aittsü ama repranger, saka iba asetkong nüburi par ya balaka ama alir.

Taiwan indang defence ministry-i China nung military drills ya aija kuli tejangja makai rara mesür ta ashir.

Taipei-i pei temeden wazüka ayutsü atema naval, air aser ground forces tem yokogo, ta defence ministry ajanga ashir.

Brehostibarnü drills agiba ya rongsenketzüng nokdang ama masü tashi ajak amshia amaker amai lir, ta Taiwanese military expert temi ashir.

Iba exercise ya asetkong temeket ajunga nung agi aser tang mezüngbuba Taipei kübok aliba Kinmen, Matsu, Wuqiu aser Dongyin asetkong tem nunga tenük yoka liasü, koba China tükum anasa lir, ta China indang People's Liberation Army (PLA) ajanga sayaba map tem nung ashir.

Iba drills nungya Taiwan anüdoklen tenem tükong ka amshia liasü. Iba tesem tükumlen ya Taiwan-i military infrastructure ajang-ajanga yanglua lir aser yangji underground airbase ka Hualien yimti anasa tenem ka telung nung yanglua lir.

Ibai Japan indang south tsütsü asetkong tem anasa lir lir aser yangi 'natural resupply route' lir.

Taiwan anüdokleni naval aser air patrols yokba ajanga China-i Taipei dang par anüdoklen ya China nungeri maktetsü ta sayutsü nükjidong

aser America nung danga anüdoklen nungi Taiwan yarira China nung missile aser rong sepai temi amaktsü ta sayuner alitsü.

Joint sea-air combat-readiness patrols, tongtipang targets tem nung mezünga amaktsü aser asangsang nung sepai tashi jangjatsü nükjidong nung iba drills ya agir ta PLA-i ashir.

Tesüiba mapanga China-i aiben Taiwan ya fighter jets aser navy rong tem agi lungbangtsü atema inyakshia aru.

Otsü yanglua US House Speaker Nancy Pelosi-i Taiwan semdangba sülen China-i August 2022 nung "encirclement" operation mezüngbuba inyaka liasü aser iba mapang Taiwan indang asetkong tuluba ya rong, tayimtsü aser missiles agi mokdanga ayur ama parnoki inyak.

Brehostibarnü drills ya Taiwan independence forces ajanga linük nungi pilatsü merangba atema temerenshi aser bendanger tashi ajanga rara mesüba atema tekumtangtsü lir, ta PLA-i ashir.

Kasa mapang China indang foreign ministry-i iba drills ya linük tashi temeden yazüka ayutsü atema nungdakba aser tejangja mera ka lir ta nenshia ashir.

"Taiwan ya samatsü makokba China indang litsü lir ta ni nenshia ashir. Ibai puti otsü nung aser status quo shidakba nung ajemdaker lir. Tarutsü nunga ibai memelentsü. Taiwan independence nung tamakok ajurutsüsa," ta odongtar Wang Wenbin-i ashir.

Taoba Hombarnü inauguration address nung William Lai-i China dang Taiwan amokmerenba anentsü shia liasü.

Beijing-i iba o ya aitsü aser Foreign Minister Wang Yi-i Lai ya maksü lir ta shi.

January ita Lai-i election nung takok anguba sülen Beijing-i sangdong ka agütsüba nung Taiwan ya China nung

shilem ka lir ta nenshia ashir.

Lai-i jembishinütsü ayongzüka China-isa magizük.

Lai-i taoba mapang Taiwan nung nüchiso bhukuma jembiba mechi Beijing-i pa ya "separatist" aser "troublemaker" ka lir ta shia liasü.

Brihostibarnü drills yagi Beijing indang rongsen benboba sayur, ta Taiwan indang defence ministry ajanga ashir.

"Küm ishika China nung indang tayimtsü aser rong agi tanen makai amokmerenba ajanga alima nung jangja-jangja yimjung tesunep raksatsür," ta ashir.

Taiwan tir indang office-ia China-i par mitkar amshia Taiwan indang democracy aser freedom amokmerenba ngua sasar, ta shia liasü.

Ajisüaka China den tesendaktep ketdangsuba Taiwan indang Mainland Affairs Council-i yimjung alitsü nükjidong memelenshi lir ta ashir.

"Rara mesüa amokmerenba ajanga temulung aser tekolok makoktsü ta Beijing-i angatetsüla," ta MAC indang odongtar Liang Wen-chieh-i ashir.

Israel sepaitem Gaza north aser south leni maneni aor

Cairo, Monupii/May 23 (Agencies): Brehostibarnü Israel sepaitemi Gaza Strip tesem balala nung tayimtsü aser alilen nungi bomb pokloktsüba nung Palestine nung 35 tepset aser south tsütsü Rafah yimti nung Hamas-i aniba telungpur den khatepa liasü, ta health ketdangsur aser Hamas osang ajanga ashir.

Israel indang tanks tem Rafah southeast tsütsü iba yimti anüolen Yibna district leni ao aser anüdoklen tesem asem nung maneni operation agia liasü, ta yangji alirtemi ashir.

"Parnok (Israel sepaitem) ano anüolen tsütsüi aotsü meranger, parnok Yibna kumbang nung lir, kong nisung

Nikki Haley-i US tir election nung Trump yaritsü

Washington, Monupii/May 23 (Agencies): Taoba mapang Republican telok nungi US tir asoshi toktepla Nikki Haley-i 2024 US tir election nung Donald Trump nem vote agütsütsü sentong lir ta ashi, shiba den lai taoba mapang toktepa liasü aser pa kübok inyaka liasü.

Mapang ka Haley ya Trump indang United Nations ambassador inyaka liasü, aser Republican party nungi tir asoshi toktepa arur March ita tetenzüklen anen.

Iba mapang lai Trump yaritsü menangzük saka la yariba votes million aika aazüktsü ajungshia liasü.

Iba tetoktepa yutsür tang mezüngbuba yimjak nung Bodhbarnü jembidang, Trump ya tajung masü, saka Tir Joe Biden ya kangasa majung lir ta lai ashir.

Küm tetenzüklen US tir asoshi tokteptsü atema Republican primary mapang Trump maginer Republican voters tem timba lungjemer Haley yaria liasü aser ita ana sülena tanga la sülen anidaker aika lir.

Taoba hopta state primary elections ana agiba nung lai vote shilem 20 dak tema ngua liasü.

Biden'er teloki item Haley Republican tem atsür arutsü meranger, shirnok timba college zünger party kata nunga malirtem aser parnoki election ya Democrat tsütsüi atsür otettsü.

La yariba voters tem maginer ta Trump-i aiben jangja-jangja shiogo, ta Biden-i ashir.

Trump-i pa indang ex-cabinet züngsem ya kanga luja jembia aru aser lai mapang talangka Republican primary nungi mainshiba yong pa kanga ain adok aser la Trump indang vice-presidential running mate asütsü asadanger ta olulu

adokba pai anentsü.

Washington DC nung conservative Hudson Institute think-tank den Bodhbarnü jembidang Haley-i party anaprong aitsü.

Saka lai tang teinyakdak US tir tali aija liasü.

Afghanistan nung tamakok ajuruba Biden-i ketdangsuba liasü, Ukraine amakba nokdangtsü kecha meinuak aser tang tesüsa tsünü nem Israel mereploksü, ta lai ashir.

"Voter ka ama asen tembar linüktemi yariba aser asen tsükchir nem shidak temerenshi agütsüba tir ka nem ni temulung agütsütsü, shibai asen arütsü wazüka ayutsü, shibai capitalism aser freedom yaritsü, shibai asenok sentsüh tajemba nungdaker ta angateter," ta lai ashir.

"Item policy nung Trump ya tajung masü, saka Biden sa tamajungba. Anungji ni Trump nem vote agütsütsü."

Ajisüaka taoba mapang South Carolina indang governor inyaka alilai la bhukumer dang yamaji inyaktsü mashi.

"Ni iba tetoktepa nungi anendang jembiba nung ni nokdaka lir," ta lai telok dang ashir.

"Kü nem vote agütsür aser tang tashi ni yarir nisung million aika den Trump-i jembitettsü, aser parnok pa den alitsü ta mebilemtsüla, aser yamaji pai inyaktsü ni imlar."

Tanü tashi taoba tiri yamaji inyaka mali, ta lai ashir.

Anungji tangbo Haley ya Trump den tesendaktep yanglua pa yaritsü asü ta nüburtemi bilemer.

Bodhbarnü lai yamaji jembiba ajanga November ita Trump-Haley Republican ticket lemozüktsü ama aikati bilemer, koba Trump yarir temi kangabo memulungtsü.

ajemdaker operation agir aser civilian tem meyrutsütsü meranger aser civilian tem ainshidaktsür ang operation agir," ta Israel mitkari sangdong ka nung ashir.

Palestine nungeri Rafah tiyong nung aliba Shaboura tesemi parnok aitba mali ta ashir.

"IDF sepaitem dak khaloktsütsü renema aliba rocket launcher ka IDF sepaitemi ngutet. Ano sepaitemi iba tesem nung kiralongrar indang longpok aser launchers tem nguteta raksatsüogo aser tejak jiteper khatepa mapang kiralongrar aika samatsüogo," ta Israel mitkar sangdong ka nung ashir. (Maneni tapak 8 nung...)

### Budapest nung 2026 Champions League final asayatsü

**Monupii/May 23, 2024 (Agencies):** UEFA-i executive committee senden Bodhbarnü, 2026 Champions League final asayatsü atema Budapest shimogo aser 2027 küm atema Milan shimogo.

Küm ana atema final ayongzüka asayatsü asoshi candidate tem rongnung Puskás Arena aser San Siro na dang liasü. Taruba final June 1 nü Wembley Stadium, London nung asayatsü aser taruba küm Bayern Munich indang stadium nung asayatsü.

San Siro koba dang Stadio Giuseppe Meazza ta ajar iba stadium ya Milan yimti meyong lir aser iba stadium bensatsü ya mapa talangka jembia arudar. Iba stadium nung AC Milan aser Inter Milan naprongla asayar aser club anapronglai stadium tasen yanglutsü atema asadangogo.

San Siro dak sendakba nung

UEFA-i September ita UEFA-i executive committee senden nung telemtetba agitsü lemtetogo. Italian soccer federation-i parnok sentong metetdaksüba sülen iba telemtetba agitsü.

San Siro kong menden 75,000 lir iba stadium nung European Cup mesüra Champions League final pongubenbuba ayongzüka asayatsü akok, kong 2026 Winter Olympics lapokba sentong ayongzüka agitsü lir.

Kasa mapang nung menden 70,000 keta aliba Puskás Arena ya küm pongu tejakdang lapok aser final ayongzüka asayatsü atema UEFA atema tetemsü lir, kong taoba küm Europa League final ayongzüka asayaogo. Hungary Ato Kilonser Viktor Orbán ya soccer fan ka aser billionaire banker Sándor Csányi ya

UEFA tenüing nung FIFA vice president lir.

UEFA indang executive committee-isa, 2026 küm tetsür Champions League final Oslo, Norway nung asayatsü telemtetba agiogo.

Kasa mapang nung Istanbul nung 2026 Europa League final Besiktas stadium nung asayatsü aser 2027 küm Eintracht Frankfurt indang stadium nung asayatsü. 2025 Europa final, Athletic Bilbao indang stadium nung asayatsü, kong taruba hopta tetsür Champions League final asayatsü lir.

Third-tier Conference League final 2026 küm Germany kübok Leipzig nung asayatsü aser 2027 küm Istanbul kübok Besiktas stadium nung asayatsü ajisüaka stadium melenshitsü akok.

### Malaysia Masters: PV Sindhu quarter-finals-i iogo



**Monupii/May 23, 2024 (Agencies):** Kuala Lumpur nung tang asaya aliba Malaysia Masters Super 500 badminton asayamung nung Brehostibarnü PV Sindhu-i game asem asayaba sülen Korea tsür Sim Yu Jin koka quarterfinal-i iogo.

World No. 15 Sindhu, shiba taoba mapang world champion lir, lai tetsür kija asaya tanabuba round nung Sim ya 21-13, 12-21, 21-14 agi minute 59 nung koka liasü. Lai tang agi tasembenbuba Korea tsürla ya kokogo.

Hyderabad nungi arishi küm 28 tain asayar ya taoba küm October ita temekok yiruba sülen meyipa aruru asayadar ajisüaka tang tashi junga masayateti arudar.

Sindhu shiba iba asayamung nung seed pongbula lir, la quarter nung top seed Han Yue den asayatsü. China tsürla yagi Ningbo nung taoba ita Asia badminton Championships nung la tsükdakja liasü.

Sindhu, shibai tesüsa 2022 Singapore Open koka lir lai Han ya pongubenbo koka lir, shiba tang world number 6 lir.

Asaya nung mezüngbo Sindhu 3-7 agi tesülen liasü saka pai point menepa tua break tashi nung la 11-10 t

tejakdang aküm. Iba sülen lai point tenet atonga ngua mezüngbuba game akok.

Tanabuba asaya tena tsüngda kanga toktepa asaya aser break tashi nung Han point ka agi tejakdang liasü. Asaya tenzükshiba sülenlai maneni tajungba asayateta la 14-10 agi tejakdang aküm aser taruba point teku nungi tenet ngutet asaya akok.

Tasembuba set nunga Sim-i kanga junga asaya tenzük aser 5-1 agi la tejakdang liasü.

Ajisüaka Sindhu-i la menepa point 6-6 aküm aser ano iba sülen Korea tsürla ya 9-8 agi tejakdang liasü.

Break sülen Sindhu 13-9 agi tejakdang aküm aser 16-14 aliba mapang point pongu atonga ngua lai asaya akok.

Kasa asayamung nung India nung tarep temeyoktep asayar B Sumeeth Reddy aser N Sikki Reddy na 9-21 15-21 agi top-seeded Malaysia nung tarep Chen Tang Jie aser Toh Ee Wei nati tsükdaktsüogo. Tetsür tarep asaya nung Simran Singhi aser Ritika Thaker nata second-seeded Malaysia tsür Pearly Tan aser Thinaah Muralitharan nati tsükdaktsüogo.

### Julen Lopetegui West Ham Head Coach kümogo



**Monupii/May 23, 2023 (Agencies):** Premier League club West Ham-i, parnok indang manager mapa abentsü atema taoba mapang Real Madrid aser Spain coach Julen Lopetegui shimba sangdongogo. David Moyes-i coach mapa toktsüba sülen tang Julen shimogo.

Arishi km 57 tain Spain nung coach ya, Premier

League season tembangtsü lia Wolves toktsüba sülen mapa makai liasü.

Lopetegui, West Ham nung July 1 nü nungi officially mapa inyak tenzüksü. Moyes-i season tembangba sülen club toktsüogo.

"Ono kola tuluka adoktsü atema tebilemdangba ka bener idaki aruogo aser tajangshiba

tasen ka atema yongya atar," ta pai ashi.

"Club aser team takok tajung angutsü aser onok nukjidong tongtetsü atema onoki takokba tashi tajungtiba inyaka teyari agütsüsü.

"Onok takok ajak nung fan tem kanga tongtibang asütsü ta ni tenangzüka agütsür," ta pai ashi.

West Ham joint-chairman David Sullivan-i ashiba agi, Lopetegui shimba ajanga season ka ana kanga junga asaya aruba dak ajemdaker tali renlokyonga aotsü atema maangka agütsüsü.

West Ham pur, Premier League 2023/24 season nung tekububa nung tembanga liasü.

### Jessica Pegula French Open nung masayatsü



**Monupii/May 23, 2024 (Agencies):** Tetsür tennis asayatem rongnung world number 5 asayar Jessica Pegula-i Brehostibarnü sangdong ka ajanga la French Open nung masayatsü telemtetba agiba sangdongogo. Lai ashiba agi, la yiruba tang tashi taneptsü junga monguteti lir.

"Tia maka ni taküm @rolandgarros nung masayatetsüsa kümogo," ta

America tsürla yagi Instagram ajanga metetdaksü.

"Ni taoba mapang ama practice asütsü tenzükogo, ajisüaka kanga kümdanga jenjang agidar.

"Anogo 5-7 danga ali asübo ni noklang nung noklang temang tajungba kümla," ta laisa shisem.

Arishi küm 30 tain Pegula ya April ita tom nung Billie Jean King Cup asayaba sülen tang tashi official asaya ka danga asaya mali.

La Madrid Open nung asayaba mapang yiruba ajanga masayatetsüsa aküm, ajisüaka lai la yiruba indang osang tejangja magütsü.

Rome Open koba Roland Garros masaya tsüngda clay-court asayamung tulutem rongnung tatembangbuba lir, iba asayamung nunga la shilem magitet,

Ajisüaka la yakta asaya tenzükttetsü, ta Pegula-i temulung lema bilemer.

"Ni grass season aser küm tepeyong asayamung balala atema meyipa arutsü," ta lai ashi.

Taoba küm Pegula ya French Open tasembuba round nung Belgium tsür Elise Mertens-i tsükdakja liasü.

Lai 2022 küm Roland Garros quarter-final tonga asayaogo, koba iba asayamung nung asayayonga aruba nung la asoshi tajungtiba liasü. La Iga Swiatek-i tsükdakja liasü.

### BENDANGLI OSANG : Tapak 7 nungi...

#### Israel sepaitem Gaza north aser south...

Gaza nung United Nations agency tuluba UNRWA ajanga ashiba agi, linük balalai atsüanem akatsü ajungshiaka Israel-i may ita tetenzüklen nungi Rafah yimti maka arudang Hombarnü tashinung Palestine nung 800,000 dak tema iba yimti nungi jena ogo.

Ano Israel sepaitemi Jabalia nunga alilen nungi rarayonga aor, kong mitkar temi nisung aliba tesem kar rongdoktsü aser anasa Beit Hanoun jila amak, kong ita ishika tejakdang Israel-i operation tuluka sangdonga liasü. Hamas telok tanaben adenshiba nokdangtsü mechi parnok arutsüsa akum ta Israel-i ashir.

Sepaitemi Beit Hanoun nung kiralongrar samatsütsü, ali

tema aser telung nung kiralongrar meyong ki o jen bushiteta raksatsütsü asoshi meita ao tenzükogo, ta Israel mitkari sangdong ka nung ashi.

Bodhbarnü khatpeba mapang sepai asem süogo, anungji October 20 nü nungi Gaza telungi aita amakdang sepai 286 tepseter alitsü, ta mitkari ashi.

Hamas teloki October 7 nü Israel south tsütsü nisung 1,200 tepseter nisung 250 dak tema pua bener aoba sülen Israel-i Gaza amak tenzük.

Iba sülen Israel-i Gaza amakdang nisung 35,000 dak tema tepsetogo aser meyirijang aika ki o jen agi nembanga alitsü südi ta Gaza health ketdangsurtemi ashir.

**BILEMDANGANG**  
"Memerangdangi toktsüba ya tashimait tulutiba ka lir."